

阿毗達磨順正理論卷第八十 涇十

尊者 賢造

唐三藏法師玄奘奉詔譯

辨定品第八之四

已辨無量次辨解脫頌曰

解脫有八種涇十前三無貪性 二二一定

四無色定善 滅受想解脫 微微無間生

由自地淨心 及下無漏出 三境欲可見

四境類品道 自上苦集滅 非擇滅虛空

論曰解脫有八一內有色想觀外色解脫二

內無色想觀外色解脫三淨解脫身作證具

足住四無色定為以四解脫滅受想定為第

八解脫八中前三無貪為性近治貪故然契

經中說想觀者想觀增故如宿住念除去色

想三中初二不淨相轉作青瘀等諸行相故

第三解脫清淨相轉作淨光鮮行相轉故三并助伴皆五蘊性初二解脫一一通依初二靜慮能治欲界初靜慮中顯色貪故初二通攝近分中間五地皆能起初二故欲及初定有顯色貪由眼識身所引起故為解脫彼初二定中建立初二不淨解脫二三定中眼識無故亦無所引緣顯色貪故三四定中無不淨解脫初二解脫相似善根雖欲界中亦容得有而為欲界貪所凌雜故不建立二解脫名三四定中雖亦得有去所治遠勢力微劣又樂淨伏故不得名第三解脫依後靜慮離八災患心澄淨故第四并近分立後靜慮名相似善根下地雖有非增上故不名解脫欲界欲貪所凌雜故初二定中不淨伏故第三定中樂所迷故又並八災所擾亂故次四解

脫如其次第以四無色定善為性非無記染
非解脫故亦非散善性羸劣故彼散善者如
命終心有說餘時亦有散善唯生得善無聞
思故諸近分地九無間道八解脫道亦非解
脫不背下地故緣下道雜故又未全脫下地
染故契經說彼^{淨十}超過下故有說近分諸解脫
道亦名解脫背下地故然於餘處唯說根本
者以近分中非全解脫故第八解脫即滅盡
定狀背受想而起此故或總狀背有所緣故
然上座言即諸有情相續分位名滅盡定此
亦非理前已廣辨此滅盡定實有體故又不
可說此定有心曾不見有心無受想思故無
容於此越路而行如說此中受想等滅寂靜
安樂阿羅漢等乃有如是殊勝解脫非無義
本相續及心可說名為安樂寂靜阿羅漢等

殊勝解脫如何計度有一類心無有所緣離
行相轉有所緣者理必有觸若許有觸寧無
受果應言何礙受等不生故滅定中無有心
理非迷正理纔覽經文便能會通聖教深趣
識非永滅言不離身如病未永除暫息亦名
有微微心後此定現前對想心已名微細
此更微細故曰微微次如是心入滅盡定謂
有頂地心有^{淨十}三品即想微細及微微心由上
中下品類別故要下品後滅定現前故次微
微入滅盡定從滅定出或起有頂淨定心或
即能起無所有處無漏心如是入心^{淨十}唯是有
漏通從有漏無漏心出八中前三唯以欲界
色處為境有差別者二取不淨一取淨相既
諸色中亦有淨界總觀為不淨寧非顛倒攝
如於苦法計樂成倒謂諸行中亦有苦雜一

向計樂成顛倒故第三取淨爲難亦爾此非過失是所許故謂亦許此是倒思惟若爾如可性非不善此是離深所得果故既不稱實何能違深令順生貪作意遠故如未離欲於淨不淨思惟淨相能順生貪非此淨中見於淨相不顛倒故可善性攝如是離欲於淨不淨思惟不淨能遠離貪非此淨中見不淨相是顛倒故不善性攝亦應例釋不淨見淨或此非謂顛倒思惟諸不淨法總有二種一者自體二者相雜諸清淨法雜不淨故亦名不淨世所極成故此思惟不名顛倒不淨雜淨例亦應爾然觀行者初修觀時非亦於淨界取不淨相但於不淨界取不淨相令心極厭惡違逆行相轉後漸增廣違逆行相普於欲界色處境中總起厭心不生貪染若於純淨

界色界色聚中勝解無能取不淨相既雖欲界諸色聚中勝解方能取不淨相故知欲界諸色聚如決定亦有不淨界性既如不淨作不淨解如何可言是顛倒性第三取淨例此應知此於所緣既如實轉如何說是勝解作意由勝解力此於境生故說此爲勝解作意即由此故得解脫名勝解解脫義相鄰故或於少事由勝解力漸漸增益觀名勝解作意謂於少淨漸增益觀因此便生無量貪染此既生已心於所緣遂被拘執不自在轉於少不淨漸增益觀與前相違增諸善本如觀樂受爲壞苦性雜苦相故觀之爲苦能伏煩惱不名顛倒如是淨界與不淨雜亦可於中觀爲不淨不名顛倒能遠離貪緣淨解脫應知亦爾觀未成滿但得名爲勝解作意後成滿

時離染果故引聖道故亦得名為真實作意如是已辨初三所緣次四解脫各以自上苦集滅諦及一切地類智品道彼非擇滅及與虛空為所緣境無色解脫棄背下地故並不緣下地苦集行相別者初二不淨第三唯淨俱非十六無色解脫攝本定故所作行相十六或非念住俱者初三解脫身念住俱次四解脫通四念住智相應者初三第七唯世俗智第四五六八智相應根相應者初二解脫喜捨相應次五解脫唯捨相應世差別者皆通三世緣世別者初三解脫已生可生各緣自世不生緣三次四解脫緣三非世三性別者皆唯善性緣性別者初三解脫通緣三性次四解脫緣善無記學等別者初三後二唯是俱非中五解脫皆通三種緣學等者初三

深十

五

解脫但緣俱非四緣三種見斷等者初三後二唯修所斷中三有漏修斷餘非緣見斷等者初三緣修斷次四解脫各通緣三緣自身等者初緣自他身次二緣他四緣三種得差別者第八第三唯未曾得餘六通二通二謂聖內法異生外法異生唯是曾得經言有色觀諸色者為顯何義非未除色能如實通此經深義然諸先聖傳授釋言未能伏除緣內色想是有色義云何知然第二解脫差別說故謂於第二既作是言內無色想觀外諸色故知初解脫未除內色想由此論者建立最初名內有色想觀外色解脫謂觀行者如害怨尸雖已離欲貪而為令堅固以不淨行相復觀外諸色由於外色數觀察故於內色中亦生厭想如樂淨者頸繫狗屍極懷羞慙深

生猷惡如是觀外不淨相已方內色身亦是不淨觀心淨故見內身中三十六物不淨充滿如觀篋中衆色類物名初解脫極成滿位此成滿位解脫何法謂心於色不樂憎背訶毀猷惡遮止欲貪即解脫欲貪是無貪性故若謂說觀故應是慧者理必不然近治欲貪故體若是慧應近治癡既近治貪故無貪性修觀行者從此後時漸復遣除緣內色想謂以勝解想自命終輿載遺身置棄尸處種種禽獸爭共食噉須臾身盡唯見禽獸或於是處以火焚燒乃至遺灰風所飄鼓須臾身盡唯見空界或想自身如酥鹽等爲火水等之所鎔消乃至身無唯見火等名內無色想觀外色解脫此勝解力除色想故雖緣身起而不見身既已遣除緣內色想心相續轉無別

釋十

六

事業勝輕安樂任運現前於此位中數數修習緣色處境猷背行相是名第二解脫成滿亦如第一解脫欲貪雖於先時修不淨想已得解脫緣色欲貪而無始來我愛難遣若觀身有仍恐退生故後復修內無色想猷惡色觀清淨過前行者爾時依初靜慮得此二觀深生味著爲欲令此轉增進故入第二靜慮復修二解脫復修二法次第如前何緣此中猷逆色想可得說與喜受相應地力使然如若集智或由觀見所習善根至成滿時故應生喜既於色想已得解脫雖遊猷觀而不妨喜次復進入第三靜慮妙樂迷故心便奢侈由此不能修諸解脫但起解脫相似善根此靜慮中地力法爾事欣猷觀俱不能成從此進修第四靜慮捨增上故心漸澄靜諸不淨

想無復增上故彼不名初二解脫但可名曰
相似善根彼瑜伽師久觀不淨猒惡轉故令
心沉感爲欲策發令暫生觀或爲暫解久修
勞倦或爲自審驗不淨觀堪能故彼復依第
四靜慮於欲界色起淨勝解先取寶衣華等
淨相由勝解力漸廣思惟徧於所緣作淨行
相如契經說彼於後時應取少淨相總思惟
諸色此雖策心而不掉舉雖觀淨相而不起
貪旣知善根勢力增上次復於境略聚其心
於一所緣觀淨而住此位名曰淨解脫滿能
究竟捨不淨想故此淨解脫亦如第二內無
色想觀外諸色然有差別謂所依地所治行
相有差別故內外道身共不共故通曾未曾
得唯未曾得故少用功而得多用功得故又
淨解脫觀順貪相而貪不生第二解脫觀違

貪相得貪不起餘五解脫應知如前思不相
應無色處釋何緣唯說內無色想除內色想
不說外耶得初靜慮時外想已除故謂得初
靜慮外色想已除第四靜慮中更無勞除遣
諸功德法漸次得故又外色想易可遣除故
除彼時未立解脫或外色想空處方除故於
此中但說除內此中所說內無色想爲但遮
色想別目餘想耶若謂此言但遮色想此言
無用說觀外色無內色想義已成故若謂此
言別目餘想應說此想爲何所緣此非唯遮
以別說故爲緣何法緣虛空界若非不淨行
相轉者如何可名第二解脫此無過失彼加
行故謂此中言內無色想是第二加行名第
二解脫多因緣故得解脫名謂已解脫此力
生故或此力能引解脫故或是種種解脫性

故或與解脫勝解俱故此諸解脫依男女身
聖者異生皆能修起唯滅盡定但依聖身於
聖身中通學無學經說滅定超諸有頂如何
可說亦依學身此雖有頂自地所攝然如上
地法超餘方得故如超一切第四定貪方入
根本空無邊處至超一切無所有貪入本非
想非非想處如是超越諸有頂貪方可得入
滅受想定謂有頂貪若斷未斷要應總伏方
入此定故雖自地而名超越或諸有學已離
有頂見所斷故名為超越或有頂法總有二
種有心無心位差別故超有心故名為超越
或隨所應說超無過唯第三入說身證者舉
二邊際類顯所餘色解脫中淨為邊際於諸
無色滅定為邊或此各在一界邊故或唯此
二種唯內道得故未嘗得故多功用得故

盡大種造色心心所法故有說第三初於身
色以勝解力取清淨相後漸遣除解脫成滿
緣身解脫此為究竟故偏於此立身證名滅
定無心唯依身住故亦於彼立身證名就勝
故然理實皆令依通有理有契經言何名身
證謂八解脫此八解脫何有情起若於所緣
恒求對治是貪愛行樂修多道如是有情能
起解脫行者何為修解脫等為令煩惱轉更
遠故為於等至得自在故既得自在便能引
發無諍等德及聖神通由此便能轉變諸境
起留捨等種種事業已辨解脫次辨勝處頌
曰
勝處有八種 二如初解脫 次二如第二
後四如第三
論曰勝處有八內有色想觀外色少若好若

惡於此諸色勝知勝見有如是想是名爲初
內有色想觀外色多廣說乃至是名第二內
無色想觀外色少廣說乃至是名第三內無
色想觀外色多廣說乃至是名第四內無色
想觀外色青青顯青現青光譬如烏莫迦華
或如婆羅痾斯深染青衣於此諸色勝知勝
見有如是想是名第五內無色想觀外色黃
黃顯黃現黃光譬如羯尼迦華或如婆羅痾
斯深染黃衣廣說乃至是名第六內無色想
觀外色赤赤顯赤現赤光譬如槃豆時縛迦
華或如婆羅痾斯深染赤衣廣說乃至是名
第七內無色想觀外色白白顯白現白光譬
如烏沙斯星或如婆羅痾斯極鮮白衣廣說
乃至是名第八能制伏境故名勝處謂雖一
切所緣色境清淨光華美妙具足而善根力

悉能映蔽譬如僕隸雖服珍奇而爲其主之
所映蔽或於是處轉變自在不隨起惑故名
勝處勝於處故立勝處名或此善根即名爲
處處能勝故立勝處名少謂所緣或自在少
與此相反說名爲多好惡色言顯劣勝色有
說於好能不起貪於惡不瞋故名爲勝若爾
勝處體應具無貪瞋故於此中有別意趣謂
不淨行相總觀好惡色如觀惡色好色亦然
總取不淨心自在轉何勞復觀惡色不淨由
曾見淨起諸煩惱以顛倒覺曾見淨故今如
實見爲治昔貪故於惡色亦觀不淨初觀此
境名爲勝知後觀成時名爲勝見能自了達
我於此中有勝知勝見名有如是想此四勝
處自性地等如次同前初二解脫謂初二勝
處是初解脫果次二勝處是第二果彼爲資

糧能入此故總觀不淨能制伏已復於此境
觀淨制伏謂即乘前內無色想別觀青等四
顯色相所言青者謂華等青言青顯者謂衣
等青青現青光顯前二種所有青相純深無
雜非如青邊所發青影及孔雀尾金剛等青
然青光言顯青鮮潔非如日等外發光明或
為顯成青色顯著舉華衣喻顯加行中取彼
為門入勝處觀非於觀內見似此色烏莫迦
華華中青勝俱生青內舉此為門婆羅妮斯
善於深色和合青內舉此為門非加行中但
取此二非皆有故不舉珍寶若處空閑先取
華相若居聚落先取衣青青觀既然黃等亦
爾然於夜分先取白星晝則取衣餘皆如上
於晴夜分烏沙斯星諸白色中最高勝故此
四勝處自性地等應知如前第三解脫以淨

淨十

十一

解脫為此四因彼為資糧能入此故前三解
脫於諸色中但能總取不淨淨相今八勝處
於諸色中分別少多青等異相故前解脫但
於色中棄背欲貪及不淨想今八勝處能於
所緣分析制伏令隨心轉由此證知第三解
脫總取淨相故立一名八勝處中後四勝處
差別取故分為四種若淨解脫亦差別緣取
淨性同立為一者後四勝處應亦立一差別
因緣不可得故已辨勝處次辨徧處頌曰
徧處有十種 八如淨解脫 後二淨無色
緣自地四蘊
論曰徧處有十謂周徧觀地水火風青黃赤
白及空與識二無邊處經於此處皆言一想
上下及傍無二無量於一切處無間無隙周
徧思惟故名徧處徧於處故立徧處名或此

善根即名為處行相徧故立徧處名此中地等顯示所緣所說徧言顯示行相行相雖等而所緣別是故徧處分為十種經言一者顯此等至思惟一類境相現前相言顯是勝解作意若異此者應言一知上下傍言顯意流轉言無二者顯無間隙無量言顯勝解無邊由勝等持磨瑩力故令觀行者心自在生能於所緣周徧觀察何故惟十得徧處名此上更無徧行相故唯第四定空識無邊可得說有無邊行相前八徧處如淨解脫自性皆是無貪善根若并助伴皆五蘊性後四勝處加行引生故與彼同如淨解脫又如淨解脫依第四靜慮及緣欲界色處為境如何地等亦名色處地地界等有差別故顯形名地等如先已說故說地等徧處不言地界等故前八

經十

十二

種但綠色處風與風界既無差別如何可言亦綠色處此難非理以諸世間亦說黑風團風等故由此前八綠色理成後二徧處如次空識二淨無色為其自性各緣自地四蘊為境此解脫等三門功德為由何得依何身起

頌曰

滅定如先辨 餘皆通二得 無色依三界

餘唯人趣起

論曰第八解脫如先已辨以即是前滅盡定故餘解脫等通由二得謂由離染及加行得以有曾習未曾習故前八徧處初修習時皆以眼識為其加行空處徧處初修亦爾以初必緣空界色故由勝解力後成滿時通緣自地四蘊為境識處徧處初修習時但以意識為其加行以初必緣識為境故由勝解力後

成滿時亦緣自地四蘊為境四無色解脫二
無色徧處一一通依三界身起然其初起多
依下地依自下地皆容後起唯無所有亦依
上地所餘一切依欲界身唯在人中三洲除
北餘慧力劣無聖教故治欲貪故上二界無
有說初起唯依人趣要由教力所引起故人
中有教天趣中無設有著樂不能初起故人
初起退生欲天由宿習力有後起義復以何
緣第三靜慮有通無量等無解脫等耶無解
脫緣前已具辨解脫無故勝處亦無解脫為
門入勝處故勝處無故徧處亦無勝處為門
入徧處故又第三定耽著妙樂於生死中此
樂勝故不能發起解脫等三此三皆欲背生
死故通無量等隨順於樂故依此定亦能修
起此解脫等三門功德若隨得一得一切不

此不皆爾其義云何得後必前前非必後謂
得徧處必具得三得勝處者必得解脫徧處
不定或得或無若得解脫餘二不定以入徧
處勝處為門解脫為門入勝處故此解脫等
差別云何唯能棄背名為解脫兼析所緣名
為勝處加無邊解得徧處名此三善根漸次
修故有餘師說此三善根由下中上故有差
別謂能棄捨勝伏所緣行相無邊有劣勝故
有餘師說解脫唯因徧處唯果勝處通二今
應思擇上二界中說者既無何緣起定頌曰
二界由因業 能起無色定 色界起靜慮
亦由法爾力
論曰生上二界總由三緣能進引生色無色
定一由因力謂於先時近及數修為起因故
二由業力謂先曾造感上地生順後受業彼

業異熟將起現前勢力能令進起彼定以若未離下地煩惱必定無容生上地故三法爾力謂器世界將欲壞時下地有情法爾能起上地靜慮以於此位所有善法由法爾力皆增盛故諸有生在上二界中起無色定由因業力非法爾力無雲等天不為三災之所壞十四故生在色界起靜慮時由上二緣及法爾力若生欲界起上定時一一應知加由教力由教力者謂人三洲天亦聞教微故不說前來分別諸勝法門皆為弘持世尊正法何謂正法當住幾時頌曰

佛正法有二 謂教證為體 有持說行者 此便住世間

論曰世尊正法體有二種一教二證教謂契經調伏對法證謂三乘諸無漏道若證正法

住在世間此所弘持教法亦住理必應爾現見東方證法衰微教多隱沒北方證法猶增盛故世尊正教流布尚多由此如來無上智境眾聖栖宅阿毗達磨無倒實義此國盛行非東方等所能傳習二中教法多分依止持者說者得住世間證正法住惟依行者然非行者唯證法依教法亦應依行者故謂有無倒修行法者能令證法久住世間證法住時教法亦住故教法住由持說行但由行者令證法住故佛正法隨此三人住爾所時便住於世阿毗達磨此論所依此攝彼中真實要義彼論中義釋有多途今此論中依何理釋頌曰

迦濕彌羅議理成 我多依彼釋對法 少有貶量為我失 判法正理在牟尼

論曰迦濕彌羅國毗婆沙師議阿毗達磨理善成立我多依彼釋對法宗經主此中述已本意言依此國諸善逝子議對法理大毗婆沙發起正勤如理觀察為令正法久住世間饒益有情故造斯論多言顯示少有異途謂形像色去來世等然諸法性廣大甚深如實說者甚為難遇自惟覺慧極為微劣不能勤求如實說者故於廣論所立理中少有貶量為我過失諸法正理廣大甚深要昔曾於無量佛所親近修習真智資糧方於智境一切無惑麟喻獨覺尚於法相不能決判況諸聲聞彼所證法隨他教故由此決判諸法正理唯在真實大牟尼尊是故定知阿毗達磨真是佛說應隨信受無倒修行動求解脫阿毗達磨順正理論卷第八十

說一切有部

音釋

瘀依歷切積
 疵血壅也
 也尼入
 羯居謁切
 隸郎計切
 儼苦協切
 隙藏也
 鎔餘切